

Mainis memia dividids

La gruppia accumpagnanta per dumondas da scola da la LR vegn schliada anticipadamain

■ **(Ir) En vista a la consultaziun dal Plan d'instrucziun 21 ha la Lia Rumantscha convocà la fin da zercladur da quest onn ina gruppia accumpagnanta per dumondas da scola. Suentar avair survegnì in'emprima survista da la situaziun prendan las organisaziuns participadas ussa posiziun individualmain davart il Plan d'instrucziun 21. La Lia Rumantscha annunzia l'october sia posiziun en connex cun il project parzial Grischun entaifer il Plan d'instrucziun 21.** Dapi l'atun 2010 vegn elavurà in nov plan d'instrucziun per la scola populara. Il Plan d'instrucziun 21 vul armonisar las finamiras d'instrucziun da 21 chantuns participads al project. Enfin la fin d'october da quest onn è il Plan d'instrucziun 21 en consultaziun. La Lia Rumantscha è interessada particularmain a l'implementaziun empermissa da l'uschenumnà model da coesistenza en il Plan d'instrucziun 21. Il model da coesistenza «rg – idioms en scola» prevesa che scolas che alfabetiseschan en l'idiom intermediateschan il rumantsch grischun a moda receptiva (leger e chapir) e las scolas che alfabetiseschan en rumantsch grischun intermediateschan l'idiom a moda receptiva.

La LR prenda posiziun la fin d'october

La fin da zercladur da quest onn ha la Lia Rumantscha convocà ina gruppia accum-

pagnanta per dumondas da scola che dueva verifitgar il project parzial Grischun en vista a l'integraziun dal model da coesistenza ed elavurar ina posiziun per il Plan d'instrucziun 21 en consultaziun. La gruppia sa cumponiva da represchentantas e da represchentants da las Conferenzas generalas da la magistraglia rumantscha (Conferenza Generala Ladina CGL, Conferenza Generala romontscha Surselva CGrS, Conferenza Rumantscha Grischun Central CRGC), da la Scola auta da pedagogia dal Grischun SAPGR, da Pro idioms, da Pro rumantsch e da la Lia Rumantscha. Suentar avair survegnì in'emprima survista da la situaziun n'è nagin consens en vista. «Quai che reguarda singuls puncts èn las opiniuns memia differentas ina da l'autra ed ina posiziun cuminaivla na manass betg a la finamira», commentescha *Urs Cadruvi*, il secretari general da la Lia Rumantscha, la schliaziun anticipada da la gruppia. «I fiss stà bel da pudair inoltrar ina posiziun cuminaivla. Quai avess focussà las forzas», di Cadruvi vinavant. Uschiglio valitescha Cadruvi la schliaziun anticipada da la gruppia sco betg problematica. «D'avair nagin consens è in cler resultat. La Lia Rumantscha vegn a prender ussa posiziun senza pudair integrar tut las opiniuns.» La Lia Rumantscha annunzia sia posiziun en connex cun la consultaziun la fin d'october.